

忠義傳

嗚呼人臣遭時多故効命疆場分也復有草莽微賤各不出閭巷捐軀慷慨蹈死如飴此豈非忠義之氣積於中而勃作於外乎廩廩焉日月爭光可也明之季可考者岷宗人朱幹屢朱茵而外則有何大衢劉中砥劉大幹彭承孟夢麟鄧國祚蕭芳鼎吳之澤凡八人大衢官知縣大幹中砥官總兵餘皆諸生與齊民也中砥一門死者又十四人其膏血原野各湮沒而不彰者可勝道哉可勝道哉

武岡州志

卷二十三

忠義

明何大衢字冲虛性俠烈尙氣嘗破產急友朋之難讀史至古忠烈事輒撫劍長吟聲淚俱下以崇正乙亥拔貢歷官四川眉州州判遷彭山知縣流寇張獻忠黨逼彭山大衢朝夕率兵民死守城陷戎服懷印綬端坐賊脅之降大衢怒罵曰我爲天子守土臣豈爲賊屈耶連殺我賊怒繫之大衢罵不絕口遂遇害

劉世玉字振之父應德夢金甲神捧日至其家生世玉幼倜儻有大志貌奇偉膂力絕倫以時方多故棄舉子業學兵法已爲岷藩審理崇正癸未奉命出使永州未幾袁有

志亂作世玉聞變星夜走長沙詣巡按劉熙祚痛哭乞師
熙祚與千人隨黎靖叅將劉承允禽有志斬之事聞擢永
州鎮遊擊明年北都陷莊烈帝殉難丙戌桂王稱號肇慶
丁亥桂林圍急世玉隨承允赴援桂王晉世玉神勇將軍
賜名中砥丁亥四月承允劫遷桂王於武岡中砥鎮守東
河八月

大兵逼武岡中砥屢表請戰時人心已散衆議奔靖州中
砥疏請與城存亡不聽倉皇出奔壬戌

武岡縣志

卷二十三

忠義

二

策馬歸呼酒狂飲語其妻王氏曰事勢至此心死已極我
惟刎此頭以報國耳夫人可自爲計妻曰君死妾義不獨
生請先死以釋君念遂自縊中砥手刃其幼子二女自殺
並家衆投繯死者凡十四人有裨將周縉護屍不去城破
大兵相戒曰此忠臣也縉乃得殯其夫婦於城隍廟側大
幹少爲道典任俠尚氣以勦土寇功歷官副總兵
大兵開武岡死之或曰大幹卽中砥實一人云

彭承孟明季爲名諸生性骯髒重名義崇正癸未土寇袁
有志乘亂弑岷顯王企鰲承孟慨然曰國家養士三百年

正爲今日今土賊手刃親藩而吾儕坐視何以答二祖十宗養士心乎遂率其子諸生夢麟集鄉勇密啓知州譚文佑合勦已而文佑失期承孟憤甚拔幟先登援兵未至爲賊所蹙赴水死夢麟大罵曰吾父死吾寧獨生力戰死之次子諸生夢龍磔賊渠屍以祭父兄事聞郡守李振珽將請於上旌卹之會遭獻賊之禍不果行

鄧國祚慷慨負氣敦行誼重然諾以時方多故每與人談及輒憤懣瞪目終日不食矣未爲賊兵所執不屈被焚死蕭芳鼎廩生性惇篤孝友負氣節袁有志之變身先義旅

武岡州志

卷二十三

忠義傳

三

屢殲賊魁州守譚文佑復城芳鼎功居多以勞勦卒

黃登梓廩生少負才名慷慨有大志明季亂兵擄掠所獲丁壯輒什伍爲羣役之前驅肩負重載登梓亦在擄中奮臂呼曰我諸生豈爲賊奴供役乎奪刀殺數人遂自刎

吳之澤廩生攻苦有聲明季攜妻朱氏避亂過潰兵逼朱氏行之澤奪兵刀斫兵及妻死餘衆逃散之澤遂脫於難國朝張光熙字克明幼慷慨有志節康熙乙卯滇逆吳三桂叛遣僞將分陷湖南醴縣

大兵進討光熙偕兄光烈引別隊自城步青角山紆道來

攻賊潰光烈戰歿光熙以功檄授沅州州判泣曰吾與兄同率義旅本圖上敵王愾下安閭里非有所利而爲之也今兄血尙腥而我曳墨綬乎固辭不赴鄉居數十年知州瀋陽于有慶延致鄉飲

鄧岐山以行伍官城步分防把總乾隆五年橫嶺逆苗叛結連龍家溪曾粟賢字莫宜峒曾楊清保等詭捏太子名號勢甚張事詳載記上四月二十八日岐山奉檄同橫嶺巡檢王淦把總李三省歐國章入峒撫諭苗衆以兵脅降岐山大罵不屈同遇害事聞

武岡州志

卷二十三

忠義傳

四

恩卹如例廕一子時有馮璽者以州民詣經畧軍門自請隨先鋒破砦經畧壯其勇許之璽躬率鄉勇直搗莫宜峒禽獲賊首楊清保身受數創其後以把總從征金川戰死者二人祝正倫寇齊輝以外委從征鎮筸陣亡者一人傳柱慶皆照例

恩卹

志曰明季劉中砥之事不載於史舊志亦逸其名今從其裔孫家得邵陽車毓秀所爲神勇將軍傳言將軍殉事甚悉傳作於順治戊子五月距將軍之歿未期年宜

可信夫當日草莽引決疆場畢命之臣皆蒙

聖朝易名曠典而將軍姓名滅沒歷百八十年始一見於方志可哀也已然則事之顯晦有時固亦有數存哉

孝行傳

嗚呼賢人長者懿德美行湮沒多矣而孝子之名獨彰此豈孝子之心哉其愛結於中而痛切於內至不得已而割股毀形出於愚孝之爲孝子之心傷矣宋崇寧間有黃達者軍市人割股救父知軍以事聞旌其名建坊東城朝京門右今其遺址歷千百年父老猶能稱述蓋舊志所載十武岡州志

卷二十三

孝行傳

五

八人而割股廬墓者六新增十二人而割股廬墓者三嗚呼此其足以雪行道之涕而汗青史之篇者矣然豈孝子之心哉

明 方觀幼篤孝年十四喪母唐氏哭泣過禮事繼母沈氏尤誠篤父患痰嗽每夕焚香籲天乞代父卒哀慟絕粒者三日迨葬苦雨觀泣禱於天遂霽負土成墳朝夕廬墓三年不忍去以養母歸不御酒肉歲時生忌往奠墓所悲號竟日繼母卒哀悼如喪父合葬後遂居廬終身焉墓石偶爲牛角所礪觀躡踊呼號牛忽自斃有鼠啣祭器觀以

不善護搥胸自責一鼠來伏噐中若輸罪狀人咸異之
事聞賜金建坊卒賜祭塋祀鄉賢

范廷瑚貢生性至孝父歿繼母已篤老慮以憂妨瑚仕將
以庶母自處瑚泣曰母將以兒爲非人乎母卒哭泣盡禮
服闋官知縣多惠政民思之

姚世定官訓導性至孝母病籲天乞以身代父歿廬墓三
年爲諸生州守禮以鄉飲大賓辭不赴及官訓導時有陰
籍其里悍民姓名相告者世定覽未終還之曰此非我職
所及不願知其人也人服其長者

武岡州志

卷二十三

孝行傳

六

歐陽蒙字養齋以例監官鄆縣主簿性誠篤祖母朱氏岷
藩太興穉主也蒙父早喪事祖母以孝聞祖母歿廬墓三
載著有歐氏家訓卒年八十七

劉再益性篤孝父母繼歿先後廬墓六載至孝所感牛羊
不敢薄墓道事聞當事賜旌獎給以冠帶延致鄉飲

胡廷玉性謹樸幼卽能事其親母疾篤割股調羹以進母
尋愈當路聞而旌之子來獻歲貢生

楊大香諸生年十四母朱氏危疾割股以進母病旋愈母
歿廬墓側寢苦由者三年兄弟析產輒讓多取少穉守陶

珙轉聞督學旌獎之

熊廷璈幼誠篤口無過言親老疾篤延醫無効割股調羹進之卽愈當道旌以孝門歲給穀帛

國朝 蕭士煥世居洞口母周氏年八十士煥事之惟謹跬步不離左右順治辛丑溪水驟發民居漂歿無算士煥倉皇負母升屋水益漲屋湮去一煥抱母附一椽呼天求救椽旋轉出村入資水達石柱江二十餘里忽爲斫柳所絀母子俱無恙已而其妻亦獲救人稱孝感

蕭士驂性至孝母李氏疾侍湯藥朝夕不離及疾篤禱天割股以進母病尋愈

武岡州志

卷二十三

孝行

七

蕭如南周民團人幼失父奉母至孝母歿毀瘠廬墓州牧葉居仁聞其行爲書至性過人四字以表其門

張永振字麟仲州庠生性篤孝老而孺慕母晚年失明永振率妻黃氏日伺母側柔聲下氣恐或違母歿永振年已七十哀毀過禮常懷置母所遺鏡奩中物挈挈掩泣家人不忍仰視哀慕終身卒年九十七歲

何大忠白塘人生有至性事繼母以孝聞康熙甲寅乙卯之年吳寇蹂躪大忠忍饑負米奉養惟謹母終泣盡繼之

以血性慷慨輕財仗義嘗破貲救人於危有劉伯順者以負餉故賣媳以償已成券矣大忠聞之惻然爲捐囊代完贖歸其媳無德色

陳廷禮齠年失父佐寡母經紀家政年二十奉母避亂山中濱危者數甘旨無缺事平復業遇歲小饑輒以所餘米分給族衆晚建義學置田畝爲族人讀書束修膏火之費所及漸廣焉又有童子李能拔者南關外人也父夢龍歿能拔才九歲賣菜以供母天真樸率自知承歡奉侍之節衆咸異之

武岡州志

卷二十三

孝行

八

劉儀州庠生性篤孝親歿哀毀踰禮凡遇春秋令節歲時生忌輒終日不食痛哭失聲爲鄉里所稱

鄧維禮穉增生至性純篤父歿廬墓三年母戴氏得心疾生左右就養寢食無違家貧投徒家塾不忍遠去塾後有古樹爲社鬼所憑每夜中飛擲沙石維禮歸省徒輩偶露坐庭中石子砰然從髮際落衆驚散維禮泣曰吾歸省母而山鬼挪揄是吾事親不誠也爲文禱於神三日後風雨大作迅雷歛劈其樹母歿哀毀踰禮廬墓如喪父時館於陳姓別墅因離墓域稍遠朝夕於野外泣拜涕零處草

爲之枯時人名之曰望蕪坪卒年七十三

王朝東幼有至性二歲喪父稍長嘗以不克逮事爲憾與人言輒涕零家貧傭工養母甘旨不缺暑夜必先驅蚊復赤身卧恣飽蚊腹使不傷母冬夜先以身溫被乃奉母寢母偶患目疾朝東跪禱於神終日水漿不入口母目竟瘥人以爲孝感所致事母五十餘年孺慕未嘗少衰

夏益罕獨力團人父歿母瞽家貧不娶傭工以養母早出暮歸惟務得母歡心四十年不懈生平並無借貸亦不輕受饋送曰吾無以償也母死塋畢不知所終

武岡州志

卷二十三

孝行

九

張世瑤性純篤幼隨父貿蜀每歲必歸省其母晚年母病泣禱不效割股調羹以進經兩夕母病漸瘳股創亦不藥自愈

劉志熟惟塘團人父病危志熟割股調藥以進父病漸痊居親之喪未嘗見其笑容卒年七十二

黃大昌東關外人事親以孝聞母楊氏病篤醫藥不効大昌禱天割股調藥進之遂痊時人咤爲孝感

霍景佐幼有至性家甚貧以負販養親每數日輒一歸省父母促之出常依依不忍捨或父母飲食稍減則憂形於

色母病景佐呼天請籲願以身代居母喪以毀瘠聞侍父左右頃刻不離每嚴冬必先以身熟寢父被俟被煖然後扶父寢或解衣縮體以手抱父足腋之使煖偶聞父咳嚏聲卽披衣起拾薪瀹茗以進父年九十四卒景佐年亦六十九廬墓三年未嘗或離遇父母忌辰輒痛哭致祭終日不食里人莫不欽其純孝老而彌篤云

劉仁則性篤孝母歐陽氏患瘰癧日夜呻吟仁則以口吮之痛稍減或有言以口咀雀矢敷之可愈者仁則終日伺墻角敗垣拾嚼敷母患處母創尋復年二十七喪妻母戒

武岡州志

卷二十三

孝行

十

之曰若有子矣衣蘆履霜昔賢不免吾不忍見兒有此舉也仁則泣受命終身不繼娶年九十四子亦七十有二父子皆老健無恙

周道郡廩生以恩例授翰林院檢討銜父早卒事母篤孝每旦夕必衣冠率妻子詣母前跪拜如禮母患臍癰須艾灸道禱於神跪灸以分母痛母創隨愈居母喪哀毀骨立生平言動必依禮法

夏景字神州岸生性敦篤讀書質魯艱於記誦父宏儒督

責甚嚴景痛自刻勵每發奮徹夜達旦經月不眠竟成父志父歿廬墓三年免喪後檢閱父書輒悲涕不自勝母患項癰勢垂危景籲天祈以身代以類觸地有聲額肉墳起母癰竟愈兄弟友愛最篤言及析產輒流涕曰析產非盛事吾兄弟老死不願見此俟之後人可也不得已乃推多任寡里人至今稱之

鄧之福長溪鄉人父早卒事母篤孝母歿哀毀致瘠暮域距家十餘里林箐深翳旁無邨落時有虎狼出入之福廬墓三年朝夕不離母族患時疫親戚無敢及門之福親爲調護卒亦無患性方嚴不喜浮屠見佛不爲禮

唐述麟州庠生事親誠敬踰園藝物必親自滌拭父病篤苦溺衆醫莫效述麟百計調護始漸瘥又數年父歿居喪盡禮事繼母篤孝鄉里咸稱道之

羅汲山生而瘡父早歿無兄弟事母篤孝家赤貧操渡舟以養母孺慕無少懈母健飯輒歡喜跳躍見人則以兩手反覆作態具白其母康強狀母或偶病憂形於色甚則嗚嗚向人涕洟滿面遠近咸呼啞孝子

劉志炘蔡家塘人母仇氏家極貧炘賣柴度日奉養不違
兄弟隨父貿川後父自川歸至益陽卒炘聞訃哀毀幾絕
星夜匍匐往益負父骸歸葬母仇氏風痺手足不仁炘尤
加孝敬盥垢滌污雖苦極無怠容也如是者三年母故百
計營葬如禮每逢父母生誕忌辰哀痛不已

志曰呂覽有言執一術而百善至百邪去天下順者其

惟孝乎孝之爲德至矣其爲道遠矣其化人深矣塞天地而橫四海者惟孝而已矣是故生盡色養之方終極哀思之道厥亦多緒其心一焉若乃感通禽魚誠動草木獨至之行可泣鬼神亦有割股傷體致毀滅性雖乖先王之典制要亦觀過而知仁矣然則茹簷委巷疋夫疋婦一念之誠而綰銀黃列鐘鼎侈然自立於朝廷之上者或遠不逮焉斯乃詩人所以思素冠孔門有以責衣錦也

儒林傳

武岡州志

卷二十三

儒林

上

仲尼旣歿百家淆亂人自爲師於是七十子之徒折衷往訓各相傳授遭秦之虐六學灰燼漢興言易自淄川田生言書自濟南伏生言詩於魯則申培公於齊則轅固生燕則韓太傅言禮則魯高堂生春秋於齊則胡毋生於趙則董仲舒天下學士靡然向風武帝黜黃老百家之言延文學儒者以百數爲博士官置弟子員能通一藝以上者補文學元帝好儒能通一經者皆復於是增弟子員三千人光武中興立五經博士各以家法教授易有施孟梁邱京氏尙書歐陽大小夏侯詩齊魯韓毛禮大小戴春秋嚴顏

凡十四博士建中初大會諸儒於白虎觀考詳同異一經說至數萬言故經學之昌盛於漢世班孟堅因而作儒林傳蔚宗後漢書因之皆錄其通經名家及師資所承者著於篇歷代史官多仍其例至宋始有道學之名後世方隅之士或依草附木竊其語錄緒餘招引徒黨而故書正記任其散佚莫由補綴摻討荒經之弊可勝言哉武岡舊志所載十二人新增十一人共編而輯之其已載列傳者不復贅云

明 劉敘永樂丁酉舉於鄉性剛直品學俱優以經術教

武岡州志

卷二十三

儒林

十三

士遊其門者學皆有本原

張道家貧篤學通經術嘉靖初以歲貢官南溪教諭置祭器書籍於學宮建漢昭烈祠回里後州守余磐欽其品學舉鄉飲大賓子繼武性篤孝母卒於父任繼武扶櫬歸廬墓三載隆慶中以歲貢官沅州訓導能以經術訓士不愧人師巡按某薦於朝以老乞歸

劉文箕嘉靖乙酉舉於鄉官宣化知縣告假歸鍵戶讀書修輯州志頗有鑒裁

姚廷芝正德朝以選貢生歷官瀘州同知績學通經居官

以廉介著致仕歸泉石蕭然絕跡公府有司嚴重焉
楊元嘉靖朝歲貢宮廣西教諭應鄉舉詰經明晰當得第
一以考官彼此意見相爭執竟下第陞四川彭縣知縣元
蹙然曰某經生不慣習吏事歸以經術友教鄉里子楚材
少穎異過目成誦食餼於學歿卒人咸惋惜
蔣廷蘭性嗜學博洽羣書尤長於三禮與張繼武皆以諸
生手定州志著有儀禮品節

蕭騰鳳字桐郊萬歷朝歲貢少負才名績學厲行爲一時
諸生之冠中年設教里黨其學以通經致用爲務及門之
士本末皆有可觀時望益歸之

武岡州志

卷二十三

儒林

十四

羅尙繡萬歷初歲貢好學不倦居恒時手一編所藏經籍
皆校訂譌舛旁行斜上朱墨爛然官常德訓導甫九月聞
父疾乞歸省視太守畱之尙繡涕泗跪請曰某若以一官
易父明公何用惜此人卽日遣之及歸父歿
周登相字贊明廩膳生幼穎異讀書攻苦屢應鄉舉不第
以經學設教閭塾及門者前後近百人多通經之士性嚴
重人不敢干以非義歿後遠近悲之

國朝

江文燦字白初父道源有傳見岷藩文燦幼奇穎

少愛經於同里潘應斗遂傳其學督學蔚州李周望奇其
文拔冠多士順治庚子舉於鄉性至孝舉足不忘親家貧
耿介不苟取束躬圭璧與人交無城府惟以文行相砥礪
未竟其用而歿

王之玖字文玉康熙乙酉舉於鄉戇直敢言人不可干以
私當事重之讀書於文昌閣無疾坐逝又有之璠者數舉
官綏寧教諭未赴潛心經學以授徒爲業

唐紹成字九韶紫西里人少英敏有遠志已從鄉先達聞
經義剖析疑難尤專精致力於易通性理皇極諸書年四

武岡州志

卷二十三

儒林

十五

十作傳授心法錄一書皆生平得力語也督學錢塘吳嗣
富序而行之晚年目盲又著心法錄解自號補過子學者
稱補過先生

謝嘉瑚字配鼎州庠生紫西里人性誠懇家故貧訓蒙養
親能得父母歡父歿哀毀過禮授徒里中旦夕必歸省母
曾爲諸生講父母之年輒潛焉出涕母卒哭泣憂思哀感
行路教人以窮經端本爲務年七十五卒

吳賢明歲貢生幼隨父中立受經唐紹成年十三卽通諸
經爲府學附生屢舉優行年四十七以痺疾暴卒著作多

散佚

胡茂秀號松崖歲貢生幼貧不能讀茂秀乃請於父願爲塾師服役因請執弟子禮樵牧之暇手執一卷咿唔不輟年十六從塾師學爲文出語清雋有里人吳賢豪者見而奇之遂引之受經於吳賢明賢豪資其膏火數年學成爲州學生督學盧召弓文弔奇其文以高等食餼授徒零陵門下士皆彬彬有本末可觀晚年以疾歸旋卒訃聞零陵弟子奔喪五十餘人賻錢二萬助塋共謀設粟主於講堂肄業如平日性廉介以不蓄爲寶每所得館穀爲弟姪輩

武岡州志

卷二十二

儒林

十六

謀生計著有春秋經解

唐珣字聘侯恩貢生狷介自守以經學教其鄉人造就有法卒年六十八

張彥豪舉人乾隆丙辰

恩科鄉試官長沙縣教諭以經學

訓士歸里後閉戶讀書足跡不履城市

李與梅歲貢生官石門訓導立品端方治經有聲尤善言易著有周易條辨

夏禮字揖讓恩貢生少穎異刻苦治經尤善春秋三傳遇諸家淆駁處輒句晰疑義反復辨論老師宿儒莫能難督

學山陽阮學浩武進莊存與兩以文行舉優檄至京禮辭不赴知州博平童式廣欽其品學屢造其廬既又延教其子聘書載道纁帛克庭禮曰某部民日侍明公左右國人將耳目之矣卒辭不受教人以窮經敦本爲務及門六十餘人學業皆有可觀家故貧日手一卷晏如也年八十八卒

彭灝字鼎乾幼端靜舉動異於常兒比長攻苦讀書以古人自期許早年有聲庠序是時學政昆明錢澧清節聞天下不輕許可獨重灝文行以優貢於朝嘗語人曰彭生吾

武岡州志

卷二十三

儒林

十七

鄒薪傳也灝聞益自刻厲舉乾隆戊申鄉試赴禮部試不第家居授徒十餘年言有教動有法人莫敢踰尺寸足跡不履公庭性篤孝親歿後與人言輒流涕晚赴禮部試以疾卒於京士林惋惜咸目爲名教完人

曾鼎廩生治經攻苦有聲講學以制行爲先居近市廛人罕見其面爲時論所重

楊春錦字蜀山歲貢生幼敏慧弱冠補諸生家貧以經學授徒里中教人嚴而有法晚官清泉縣訓導縣士習頗漓有司訟牒皆牽連諸生爲左證春錦至繩其尤黠者以法

其黨糾數十人噪於庭春錦厲聲曰吾職司學校如若所
爲實自外名教而君等又袒之此何爲也噪者皆俛首去
太守玉德聞而嘉之士習一變清泉蔣一璉名宿也時里
居謂人曰經師易得人師難求若楊君者兼之矣以老乞
休邑人謀奉粟主生祀於西湖之文昌閣春錦爲諸生時
以訟事羅織幾罹不測事白深自刻厲生平寡言笑不輕
喜怒年八十四卒門弟子皆篤老發喪製服私謚曰慤簡
張蓉州庠生治經有聲里居以教授生徒爲業言動必依
禮法與門弟子講說經義肅衣冠端坐嚴寒盛暑未嘗少

輟州人通經者多出其門性篤孝早年喪父水漿不入口
者七日羸瘠骨立居母喪亦如之晚歲家居鄉人罕見其
面臨卒囑其子猶諄諄以窮經敦品爲務云

志曰濟南旣髦始傳尙書西河喪明乃序詩傳若乃申
公轅固之倫槁項黃馘衰殘守闕奉一經以終身何則
其業專故其詣馘手也以余所聞武岡曾明經家模治
經有本原其所箸儀禮先易春秋述朱古今圖考諸書
於天官地志河渠水利九章算法周髀七曜之說援據
辨論殆皆有精思斷制非苟作者而窮老目盲子又歿

折姓名不出閭巷嗚呼子長氏所爲致嘆於巖穴之士
非附青雲而名不彰也家模衰老以生存於法不得列
傳云

文苑傳

易曰觀乎天文以察時變觀乎人文以化成天下傳曰言
之無文行之不遠文之不可以已也如此夫自國風變爲
離騷屈原宋玉唐勒景差之徒皆以文辭顯於楚美人香
草感均頌艷楚固文人之祖也被其風者是宜家韻樂石
人握靈珠矣若乃胡曾之徒僅一見於晚唐而詞罕泉源
武岡州志

卷二十三

文苑

十九

言多胸臆渺歷歲年未聞接武雲山資水伊豈無人託志
於前修通心於來哲蓋韜光匿影不聞於世者多矣我懷
其人若或遇之

明 張繼志篤學厲行能爲詩陞慶中以邊事急需才詔
徵天下山林隱逸之士有司以其名上固辭大吏以儒官
徵敦請鄉飲亦不赴布衣終身嘗作瑞芝賦其詞曰歲元
黜之沼灘兮溘朱明于蕤賓產靈芝於邵陵兮雜五彩之
繽紛稟天地之清淑兮吸日月之燿煜洎一氣之沆瀣兮
啟三秀之困輪倏芳風而藻川兮或霧布而雲合散瑤光

之陸離兮森珉枝與金萼羌澹水之滋漑兮又香草之薰
灼攀杜蘅于九畹兮異蘘藟之綽蒟蒻朱柯與紫筍兮恍
琪花之蒨爍於是擷靈芬以承筐兮擘羣卉之馨芳離卑
濕之下土兮陬君子之高堂克珩璜之雜佩兮佐潔白之
壺觴願屑玉而爲液兮願琢瓊以爲漿沁甘露於金莖兮
流橘井之寒香信長生之可必兮樂詹壽于未央日余倥
偬以侘傺兮雜蒿艾而何妨也抱菴施之寸心兮雖不死
亦自傷也委嘉貺於草莽兮亮瀛島其無望也抱靈芝而
老死兮終吾生以徇罕也他文多散佚

武岡州志

卷二十三

文苑

二十

潘一龍字水雲兄一桂有傳一龍善書翰精繪事與都指
揮僉事翁源陳璘善萬歷中朝鮮用兵起璘爲禦倭總兵
官璘嘉靖朝宿將與劉珽麻貴齊名賓客皆知名士獨重
一龍軍中常與俱已又從平播入青蛇瑪瑙四圍抵海龍
圍璘前後進呈神廟征倭陸梁島圖征播九龍圍圖皆出
一龍手性跌宕不羈嗜酒豪吟自號雲山樵子

劉春萊字芝侶幼爲州學附生嗜學博古爲詩文有奇氣
敏捷立就性踈懶畏禮法遂棄舉子業恣情山水中年後
更狂放科頭箕跣不樂見貴人有當路欲致之不得迫見

於麀趾巖閣上春萊聳身躍窗下竟跛時人呼爲跛侶有
芝侶詩草多散佚所存僅數篇同時有王應衡號明峯亦
博記能詩

唐國讚天啓時人嗜古篤學嘗磨墨苦思將有所述適母
饋餅一盤蜜一盂國讚食餅誤以墨汁濡之俄而母徹盤
孟見其口角唇齒皆黑而蜜如故曰癡兒欲嘔出心肝耶
其專摯如此爲文思致古淡惜多散佚

曹志伊一夔曾孫幼警敏絕倫與儔儕角文藝率皆辟易
亦能詩崇正朝恩貢未仕卒

武岡州志

卷二十三

文苑

三

潘應星崇正朝以恩貢官禮部儀制司主事性孝友爲諸
生時父疾篤禱天願以身代刲肱傷重幾斃預書片紙置
刀旁示以烹調之法血淋滿室猶跪誦佛經事繼母曲爲
承順內外無間言應星嗜學強記幼與兄應斗以文章道
義相切劘詩文皆有成就晚年兄弟偕隱與邵陽車以遵
王嗣乾友善皆前明遺老也各所居曰儔影堂作儔影賦
以見志其辭曰昇晶壘空兮烏羽翔兮皎胡茲茲兮兔魄
昂兮熒烜支檠兮俊侏乎櫺光兮潛仰瞻怯顧兮而獨徘徊
徊兮其誰將兮去不可鑑兮來不可嘗兮履之靡卑兮揚

之靡狂兮抱形不稅容與徇年兮肆戀戀亦曾何傷兮爾
既不時舍予奚撥撥兮達勿矜羽兮窮勿憐兮庶兩無愧
忤兮終始以借臧兮著有儔影堂集子友洙亦能詩明代
能爲詩者又有楊楚材黃裳楚材有仙院詩裳有雲山詩
俱不俗

國朝 郭惟寰幼聰穎與江文燦友善皆以詩學就正潘
應斗兄弟應斗嘗呼爲小友應斗修州志惟寰與文燦實
佐成之詩篇多散佚以諸生終時與維寰佐修州志者有
朱企鉞岷藩宗人也亦能詩又有劉允璆許國煥夏國璜
武岡州志 卷二十三 文苑 三

楊自芳皆以詩名允璆康熙辛卯舉人官內閣中書國煥
拔貢國璜自芳皆諸生

唐時鄰字欽子本州之紫西里人以邵籍補弟子員故又
爲邵陽人幼聰慧異常與邵陽車鼎晉同里潘應斗友善
每一藝出時輩皆斂手中年棄舉子業專肆力於詩所著
有雲歸草一卷璞草一卷雪中詩一卷廬中唸一卷應斗
序而行之謂其於王儲爲近時鄰有至性事母孝交友信
晚以歲貢官荆門訓導卒於官

尹進德舉乾隆癸酉鄉試詩文皆有可觀嘗作雲山賦其

詞曰岷巔爲祖衡嶽爲昆武岡雄鎮厥號曰雲峯起火雲
之奇突嶂列慶雲之輪困入雲霄而河漢無影出雲雨而
碧落不分蓋嘗考道書居六十九之福地稽古志載七十
一之崇巒畧陳諸美可見一斑日華耀彩月魄流丹爛縵
兮杏花之塢蹢躅兮竹掃之壇響珮懸珠簾泉汨汨飛濤
濺沫瀑布潺潺石立將軍之狀橋呈蟠螭之觀則有寺傳
勝力臺記演經霜天唳鶴夜月吹笙况復莓苔跡印鐘磬
音呈空中卽色天籟無聲依依往躅渺渺予情豈不一句
曲之嶽峯兮表於茅氏崆崗之縹緲兮著於廣成餘多不

武岡州志

卷二十三

文苑

三

錄進德與呂律同舉於鄉律刻苦嗜學亦以文名於時
許如灝字百涵有文名屢舉鄉試不第時湖廣鄉試以武
昌爲行臺省湖南士子遠涉洞庭經月始達每以風阻愆
期康熙丙子如灝應舉守風洞庭乃爲文以祭投江中風
順得渡其畧曰某學慚語海志切臨淵願觀光於上國屢
泊浪於重湖正白帝攬權之辰值南風不競之日徒看江
上風清空想樓中仙去非藉反風於此日何由破浪以長
征語多彬雅可觀以歲貢終

唐永飛字奎翥舉乾隆甲午鄉試幼聰穎好學爲詩文操

筆立就辭采煜然比長受經長沙余存吾湘潭張九鑑攻
苦益勵凡經史疑難及聱牙難讀者札記置懷袖間偶遇
行路亭肆樹陰或荒洲野渚輒出札朗誦人皆以爲狂偶
以事宿親故家夜半打門狂呼主人驚起問何爲曰無他
案上短檠垂滅爲乞殘膏少許完此夜課耳其勤學如此
歷官綏寧訓導茶陵學正湘陰教諭著有易知安本石村
近草石村遺稿經驗良方諸書同時有李會甲阮永相高
笏圭皆以能文名會甲乾隆辛卯舉人官靖州學正亦能
詩永相笏圭皆歲貢有顏其東者亦文士也嘉慶辛酉拔
武岡州志

卷二十三

文苑

二十四

貢嗜學強記嘗師事長沙余存吾湘潭羅典所作經藝皆
有可觀

楊承德幼穎慧好讀兩漢六朝之文諷誦畧皆上口家故
饒貲承德性豪俠喜交納不事生產家遂中落見人不作
寒暄語或與之論古今人物句晰經史疑義終日娓娓不
倦坦率無城府有以謔語誑之者輒信然義利之界斷斷
如也是時昆明錢以督學楚中奇其文將舉拔萃科以不
善楷法罷中乾已酉副榜貢生年四十六卒承德爲制
藝苦思索多散佚晚年尤好易欲有所發明卒未竟其業

云

獨行傳

范蔚宗之傳獨行也其言曰中世偏行一介之夫能成名立方者蓋亦衆也或志剛金石或意嚴冬霜蹈義凌險死生等節雖事非通圓良其風軌有足懷者以其名體雖殊而操行獨絕故總爲獨行篇焉嗚呼若而人者孔子之所謂狂狷文中子之所謂振奇人也古之人與古之人與曷可多得哉

宋 李友直淳熙間進士性至孝世居濟水之石羊渡父

武岡州志

卷二十三

獨行

五

名世楫字濟川嘗言我欲於其地作橋以濟行人而緝於力友直既貴遂成父志以濟川名橋示不忘也知軍許應隆爲之記見文徵

元 楊再成儒林鄉人幼慷慨好義重然諾廣交遊時武岡縣尹延承直議建書院於儒林鄉再成欣然捐貲身任其事時佐之者有楊景清江正順張茂卿學錄趙長翁爲作儒林書院記見文徵

明 于子禮父業木工子禮世其業性謹篤兄子仁故多幻術子禮誠之曰兄勿惡作劇累吾門兄既貴子禮不改

業及子仁遭逮時子禮以匠役在京乃囚服自械蹠跟奔救以母老乞留兄侍養願代兄死上感其意復予仁官子禮隨至任所不入署但曰兄今後宜知警無自恃奇詭矣言訖遂別仍赴役上聞得實並免其役

顏昊天順朝恩貢性豪宕慷慨以廉介爲鄉里所敬憚嘗拾遺金還之其人歷官知縣有政聲

張必興好施與正統六年大饑必興出粟一千三百石賑之事聞敕諭勞以牛酒旌爲義民仍免本戶三年徭役

蕭添茂性謹恪以忠信爲人所任時州守修建學宮衆議

武岡州志

卷二十三

獨行

三

舉添茂經理其事畫夜摩晝不憚勤瘁畢盡其制士多感之年八十三四舉鄉飲大賓子騰鳳自有傳孫世澤舉崇正丙子鄉試

許國柱字調元舉天啟辛酉鄉試性孝友有雋才美丰儀弟祥以岷獄牽連左證械至京國柱兩詣都代白其寃得釋未仕卒時又有郭希堯者性誠篤與人無忤與季弟友愛最摯以交讓田宅爲時所稱

鄭金城都督維城弟也維城故任俠廣交遊以結納蕩產金城躬耕力食兄有所需必竭致之維城以故益豪宕傾

賞結友日從諸少年學距躍擊刺之法舉萬歷武鄉試金城鬻產資之北上維城卒以其力成武進士官都督而金城布素終身

潘一桂字斯馨幼有至性隨父思彬宦於黔遂以黔籍爲鎮遠府學生母項氏沒父任所一桂毀瘠踰禮朝夕寢處柩側扶襯歸葬哀感路人後以事失愛繼母頗非禮凌虐一桂孝養備至竟曲得其歡心嘗遊粵西拾遺金待其人還之旋與同舟一桂偶墜水其人卽赴水救人皆曰是何報之速也家貧絕無窘色惟以敦睦勸其鄉里人多化之

武岡州志

卷二十三

獨行

二十七

子應斗官更部郎中加太常寺卿應星官禮部儀制司員外郎皆有傳

霍鳳翔性剛介不避權貴鄉人有負屈者鳳翔必力爲申辯爲鄉里所嚴憚年六十薦於朝尋卒太守某欽其品遣弔賻贈

張鼎性端方一介不苟嘗督修學宮拾遺金無主可還鼎曰無故獲重財而又匿之不祥也願以資士之學行俱優而貧乏者乃以助諸生劉翼州守聞其賢旌其門曰高義許大伸諸生敦尙名義嘗立義倉積穀以賑宗族之貧者

全活甚多。穉守旌其閭曰仁義之門。時又有劉鵬者仗義好施，四與鄉飲。

黃世光好善樂施，能以仁厚化其鄉人。年四十無子，曾從溺救劉盛楚。盛楚日為禱於神，祝其生賢子以報德。是年果生子，裳年八十三無疾卒。

按黃裳舉永樂丁酉鄉試，不宜列明。未蓋康熙志世光生子裳，見貢士貢士無黃裳或黃芳之誤也。

國朝舒加冠字君錫，有隱德。門庭雖肅，內外無間言。牧守聞其賢，屢延致鄉飲，督學繆沅欽其品，謂州守曰：貴州舒君韜光，匿采勝國名賢也。卒年九十餘，祀鄉賢。

武岡州志

卷二十三

獨行

三

國朝鄉賢以布衣崇祀者，加冠一人而已。子偉恩貢生張浩州庠生，少孤事母篤孝。康熙辛卯，應童子試，聞母喪，徒跣奔歸，晝夜行二百七十里，以頭撞棺，血淋漓，面絕而甦者再，遂成羸症。凡遇誕忌，設祭悲哀如初。喪為諸生數十年，言規行矩，嘖笑跬步必嚴，人敬憚之。尤喜施濟，乾隆己未穀貴，沽出穀一千三百餘石，平糶不索券，亦不籍姓名。其尤貧者，捐其值讀書，以敦本為先。嘗輯涑水家範，紫陽家禮，與時俗相宜者彙為一編，與其鄉人遵行之俗頗化焉。又有楊歸鳳者，社倉初立，歸鳳首捐穀一百二十石。

州有社倉自歸鳳始也

張宗斗前儒里人家貧無餘貲而能濟人之急身自服賈以養父母里中遭時疫衆皆避去宗斗獨詣病家親爲調醫藥疫死者爲買棺殮葬之宗斗卒無恙曾以販歸自洪江途遇周姓以逋欠故將嫁妻以償宗斗解囊得二十餘金代償之卒全其夫婦

王之瑋少任俠尙氣節好讀書家故貧父母相繼歿遂棄書務農殖畊作而延師課其弟之致力學之攻幼聰慧舉康熙己酉鄉試益相勵以清白丙戌歲旱自質田代其所

武岡州志

卷二十三

獨行

二十九

識貧者稱貸貧者不能償遂自殺入其田不惜有山左難民自鬻爲奴之瑋爲捐金贖出年八十餘無疾端坐而逝謝榮州庠生雍正辛亥歲饑穀價騰貴封殖者故閉糶以昂值榮出積穀千石石銀四錢視時值參分其一而弱州守葉居仁聞而義之厚加宴勞旌其門弟某實佐成之又高沙市阮佑彬袁繼咸者亦義士也乾隆甲戌饑佑彬繼咸傾囊糴米煮粥以食其鄉之餓者

唐昌邵字六甫紫西里人父一才年五十始生昌邵幼倜儻多辯去村里許有叢祠古塚纍纍客死者率寄厝其旁

爲野火所燎朽槁皆燼里人因唆怨家誣控一才昌邵年十四代父申辯事得白父歿居喪盡禮時亂兵縱掠昌邵與其兄昌邦以奇計脫羣從小功之親九十餘人於厄事平躬耕養母以篤孝聞昌邵善會計率致富饒積而能散又念兵燹之後郵亭學社多殘燬不堪乃首出貲建書社二以教族人建客亭三以便行旅皆捐置田畝至今後嗣猶能守其法云

張萬容州庠生祖文俊性敦樸好施濟家固富饒嘗出貲買渠渡田築堤置閘以通水利鄉里至今賴之雍正朝以

武岡州志

卷二十三

獨行

三

公舉爲農官萬容幼有至性父歿毀瘠廬墓讀書墓側每執卷哀號聲動隣里有從兄大猷兄弟相繼歿遺子二齡萬容撫之如已出卒爲經理其婚娶至於成立好施與文俊有積金千餘兩匿地窖家人莫知其處獨愛萬容循謹臨終私示其地萬容陰識之祖歿萬容語其叔某啟篋均分隨散給族人無德色乾隆乙酉歲饑道殍相望萬容爲粥以食全活甚衆生平無譽言無過舉人不敢以非禮干卒年四十人咸惜之

萬咸理生有至性肫篤過人母顏氏歿咸理尙幼毀瘠踰

禮朝夕廬墓側泣血罔間侍繼母劉氏尤篤劉病躬親湯藥衣不解帶者累月尋父母相繼歿居喪盡禮仲兄宗學客雲南音耗梗絕或傳其已死咸理時居喪與人言輒嗚咽或號哭原野哀感行路終喪後卽裹糧徒步展轉數千里至滇知其死確乃發喪制服訪得墓處拾遺骸以木槨負歸塋祭如禮遇繼母弟多方調護門庭離肅人無間言好施與家不中貲能自刻苦以其餘周給貧乏鄉鄰以曲直質正者必力爲排解以子思誠官婁縣巡檢馳封登仕郎孫開燧官知縣開煥官訓導

武岡州志

卷二十三

獨行

三

戴宗柱字南鎮監生連平刺史宗槐兄也弱冠失怙仲弟宗校及宗槐皆幼家故貧宗柱棄書治家人生產竭力以養母督宗槐苦讀宗槐旣貴歷官廣東連平州知州宗柱儉朴自甘不改寒素嘗諄諄以清白吏勉其弟宗槐所至有循聲人咸謂賢兄之力也性篤孝終身孺慕母卒年九十宗柱亦七十猶哀毀過禮廬墓暮年以宗槐貴馳封奉直大夫

戴祖瀚父友忠因家貧攜其兄祖汾販於蜀祖瀚方幼操樵易米供母食數年父歿凶耗至家祖瀚徒跣奔喪背負

父骸歸里祖份仍畱蜀以計然術稱小裕挾貲歸頗置腴
產祖瀚以爲兄勤苦所積不忍均分強之始五其數而取
一焉一日忽從夢中呼其子近前曰爾祖爾伯邀我往川
東去可速治後事遂無疾而逝

雷應鼇性孝友年十二父歿食貧孤露不殖產業季弟某
商於外逋欠累累責債者日噪其門應鼇變已產代償不
足又出其妻漆氏釵飾益之無吝色友愛彌篤中年投徒
有貧乏者却其執贄三次倡修渡頭橋廉介勤謹爲鄉邦
所推

武岡州志

卷二十三

獨行

三五

歐陽元旺與其同母弟析產多年元旺以計然術行於蜀
所獲金歸與弟均分弟兩喪妻皆元旺爲之婚娶弟欲學
其術與之貲虧千餘金元旺不較也弟故無行晚歲蕩檢
益甚元旺臨歿屬其子化吉以父事之

戴世昌字常盛雙林團人家貧樂善好讀書篤於孝友母
年九十昌年六十八溫清定省事必躬親弟世尼早歿生
子未暮世昌撫字不異已出至於成立家法森嚴門庭肅
穆人稱其賢子元相歲貢

袁仕高監生性肫篤有義俠家固貧仕高以計然術致富

兄歿視姪猶子教養婚配不異已出再從姪光宗者貧乏無以自存仕高以時調恤臨終割腴田三十畝給之其族鄰孤寡賴以舉火者十餘家

許尙仁監生性友愛有弟三人其季尙攀家固饒貲無子早卒臨終泣語尙仁曰弟無子諸姪雖多然兄有丈夫子四其最小者謹厚弟所愛也乞主弟祧鬼而有知其不餒而尙仁泣諾弟歿尙仁曰弟嗣當立弟產不可利也乃籍弟所有爲公田而四分已產命幼子挈四之一以繼弟後又割腴田五畝畀之使奉烝嘗焉居平能以仁讓不爭化武岡州志

卷二十三

獨行傳

三

其族里皆能稱道之云

劉鼎璟號竹園州庠生以子文徽貴累贈中憲大夫河南糧鹽道三歲失怙恃依其祖居九歲祖命之曰汝孤兒宜立志勤學鼎璟痛哭稽顙誓不忘比長讀書羈城孤露食貧斬然自立嘗以其所學教族儔士多信從之里苦徭役不均鼎璟爲按戶籍計錢布權子母上不悞公家之務退卽以篤睦嫻任卹之誼立義渡於龍口潭建客亭憇行旅性明決能以片言解紛爭之質正者語詳安鄉潘相傳子七人文徽自有傳最幼文徵少孤事母兄以孝友聞卒年

四十歿後能神子姪輩有疑事以盃筴卜其應如響語詳
湘潭張九鉞傳

許迺燠增貢生性誠愿立品端方家固中貲自奉甚儉而
好施與許氏州中大姓向學者多迺燠捐置學田四十六
畝各其堂曰貽穀設立規條其法以入州庠人數多少爲
厚薄新進者獨收租一年食餼充貢及鄉會中式以次加
增捐金置城西石下江渡口船補修灌塘大路又捐粟贍
族鄰孤寡臨終猶屬其子遵行勿替

武岡州志

卷二十三

獨行傳

三十四

罄積穀百餘石散給族人人五斗小者三斗一日而盡又
宅旁里許有叢塚纍纍多陷露朝以捐貲培築數百塚焉
劉上仁惟塘團因父貿川時仁十五慮父年邁奔苦終養
後榮歸梓專行樂施渡頭天心兩橋多金倡修且長子賢
德又樂培植遺言將鳳州冲田損泮宮孫貢生斌繼体祖
父之志遵頌無異斌更孝友母日不明每食親進弟分多
年斌只四口弟十餘口負虧任多家貧如洗恐母望慮斌
將已田變賣代賠弟楚勸弟合爨無分彼此孝友傳家善
念咸稱

補遺誥封

鍾一佩以曾孫鍾岳馳贈武功將軍

鍾相才以姪鍾岳馳贈武功將軍

鍾相能以子鍾岳馳贈武功將軍

鍾祖浩以孫鍾岳馳贈武功將軍

鍾相權以姪鍾岳馳贈武尉都尉

鍾思振以弟鍾岳馳贈武功將軍

武岡州志

卷二十三

獨行傳

五十四

方技傳

夫陰陽祲祥之說儒者不言然其理洞元微數探神妙蓋亦有道焉在昔箕疇垂經義畫衍易裨竈梓慎說見春秋由來遠矣兩漢而下迂誕俶詭抑又甚焉求其宏道濟時隱身利物如君平季主華他伯休之流或不多觀意在斯乎意在斯乎釋老前史多列方術今仍之云

明 元尊宿名音可武岡鄧氏子幼祝髮薊城之五臺菴

戒律最嚴爲耑愚禪師首座後遍遊吳越所著泐潭慧山諸錄一百二十卷海內稱元尊宿焉

無涯雲山勝力寺主僧始入廬山二十年萬歷中至京師以戒律聞神宗召見賜龍藏紫衣歸雲山靜叅八定二十一年會稽張修撰元怵以使事至武岡入雲山訪之貽以詩偈有云以有涯逐無涯是爲迷以無涯照有涯是爲悟迷悟之端有無之故咄咄老僧能自度年七十五坐化貽一螺髻徑尺許注水其中清冽異常經歲不竭能愈奇病後爲一俗子所破寺僧膠而合之不復靈

武岡州志

卷二十三

方技傳

三五

吳文蕙通醫術每以醫藥濟人不索值性誠篤尙義州人修建學宮文蕙與有勞焉

國朝 田生琰字象占州庠生幼聰慧清癯善病父母恤之不令其苦學生琰乃稍涉內經素問能通其意旣冠補弟子員棄舉子業專肆力仲景河間東垣諸家遂精其術其立方不主故常每以意爲之輒有神效中年構亭大道旁日坐其中煮茗以施行人病者飲其茶輒愈說者謂生琰陰以藥濟人惜其法不傳也

劉詵迺西路茶園團人幼習天文占候孤虛遁甲風角讖

緯之術多所宣究嘗以其學謁桂林相國陳宏謀文恭深信其言撫楚時延致幕中已又從至吳粵宏謀入閣隨至都下凡宏謀蒞官處必與俱一時名公卿多禮下之海寧相國陳其倬尤與善最後宏謀家居誥廸亦篤老遣二僕舁至桂林爲擇生壙誥廸好學博聞強記性孤介不苟以故與宏謀交最篤凡所言多奇中宏謀在楚北時漢上多火災誥廸以形家言於離位別開一術以制之火患遂息著有地里辨疑平洋葬法集錄古今堪輿名論諸書子青萬亦世其業宏謀爲納粟入監晚年頗自矜賢不輕爲人

言或問青萬孰與君父青萬曰形家如用兵然吾但知讀父書至於臨敵應變之妙非所及也時以爲名言誥廸壽至九十四歲青萬卒年亦八十

黃大猷家貧父早卒有三兄皆客滇大猷少讀書習卜筮占候之術獨畱養母尋以卜推測知兄當死乃賣卜往滇既至伯叔兩兄皆歿大猷因畱滇更仲兄歸凡殊方異產必寄歸遺母一日感異夢晨起卜之擲錢驚泣曰咄吾母病矣卽日促裝歸及門母患癰大猷衣不解帶服勞倍至日中垂簾市上以所得供母又五年母歿哀毀踰禮族人

矜之大猷爲人占每以仁孝相感動所言亦有徵驗

志曰余至都梁州人爲余言有劉詵廸者隱君子也旣見其子青萬年已篤老與之語呐呐然如不出口已爲余言其父與文恭交甚悉又令人憬然生尙友之心也文恭以清節聞天下爲理學名臣顧眷眷空山一叟意其人非僅以術鳴者卽青萬可知也大猷爲人占無異術獨其兄弟母子之間其應如響蓋一氣之感通非五行所能測矣嗚呼匹夫一念之誠可動鬼神而况孝子悌弟之肫肫乎古人所爲齧臂而心動感夢而宵征也

武岡州志

卷二十三

流寓

三十七

流寓傳

都梁遠介南服非冠蓋輻輳之邦秦漢以上盧侯陶鄧荒渺無稽靡可得而言焉若乃遷客騷人芳踪未沫黃冠野服肥遯自甘復有問關抱主溝瀆輕生血化杜鵑辭存衣帶舉之則皆外來之人措之則昧闡幽之義以其畱連茲土自號寓公故統附之流寓傳云

宋 陳與義字去非其先居京兆自曾祖希亮始遷洛故爲洛人與義天資卓偉爲兒時已能作文致名譽流輩敘衽莫敢與抗登政和三年上舍甲科授開德府教授累遷

大學博士擢符寶郎尋謫監陳留酒稅及金人入汴高宗南遷遂避亂襄漢轉湖湘踰嶺嶠久之召爲兵部員外郎以資政殿學士知湖州提舉臨安洞霄宮卒年四十九與義容狀儼恪不妄言笑平居雖謙以接物然內剛不可犯其薦士於朝退未嘗以語人士以是多之尤長於詩體物寓興清遠紆餘高舉橫厲上下陶謝韋柳之間嘗賦墨梅徽宗嘉賞之以是受知于上云其避亂來邵寓邵陽周靜之家愛艷中山水徧肆遊覽居武岡最久題咏甚多

芮晷吳興人仕宋爲從政郎以和沈長卿詩云寧令漢社

武岡州志

卷二十三

流寓

三十八

還 稷變作莽乾坤秦檜當政惡之坐謫武岡軍及檜死乃放

樓鑰字大防明州鄞縣人隆興元年試南宮有司偉其辭藝欲以冠多士考官胡銓稱之曰此翰林才也試教官調温州教授光宗嗣位改國子司業擢起居郎兼中書舍人代言坦明得制誥體繳奏無所回避禁中或私請上曰樓舍人朕亦憚之不如且已光宗內禪詔書鑰所草也有云雖喪紀自行於宮中而禮文難示於天下薦紳傳誦之趙汝愚謂人曰樓公當今人物也直恐臨事少剛決耳及見

其持論堅且嘆曰吾於是大過所望矣寧宗受禪侂冑以知閣門事與聞傳命頗有弄權之漸侂冑嘗副鑰為伴以鑰不附已深嘆之至是奪職告老至再許之侂冑誅詔起鑰為翰林學士遷吏部尙書兼翰林侍講除端明殿學士簽書樞密院事升同知進參知政事薨年七十七贈少師謚宣獻鑰文辭精博自號玫瑰主人有集一百二十卷寓武岡時遊法相巖愛巖旁石柱題碧玉簪三大字旁書四明樓鑰書罷守姜桐立共十三字筆力清勁姜桐者亦明州人知武岡軍鑰同鄉也

武岡州志

卷二十三

流寓

三十九

明 劉三吾茶陵人也初名崑後名如孫字三吾以字行兄耕孫壽孫皆仕元耕孫寧國路推官長槍賊陷寧國死焉壽孫常寧州學正武岡洞獠寇常寧亦死之三吾避兵廣西客武岡寓居新寧寶安寺明兵下廣西乃歸茶陵洪武十八年以茹瑞薦召至年七十三矣奏對稱旨授左贊善累遷翰林學士時天下初平典章闕畧帝銳意制作而宿儒凋謝得三吾晚悅之一切禮制及三場取士法多所刊定三吾博學善屬文自號坦坦翁有送州人于子仁復任昌樂詩

張同厥字別山崇正壬午捧制書存問岷藩癸未三月袁
有志之變同厥從武岡還邵陽值獻賊破荊州因僦居邵
陽卓氏之囊螢閣妻高氏崎嶇亂離負張氏七世神主以
至同厥欲走桂林道梗不達僑寓邵陽武岡新寧之境後
同瞿式耜死桂林之難見記載桂王諸臣傳

陳蓋更名賡魏縣人辛未進士官御史崇正壬午巡按雲
南甲申春率兵入衛以途梗留滯邵州悍將張先璧奪其
馬劉承允截其餉蓋部曲既散挈妻子僦居邵陽隆回鄉
年餘鐵騎營復掠其家流竄武岡憤恚以卒

武岡州志

卷二十二

流寓

四十

劉明遇字浣松四川人明桂王故臣避亂隱居武岡之洞
口及新寧象王峯授徒著書以自給所著有雲勸齋集石
倉詩草

劉廣允字遠生西安人桂王時官兵部尙書弟湘客字客
生官正詹從王避亂武岡以其父曾爲武岡訓導因僑寓
焉後不知其所終

雷德復江西人官給諫明季避亂武岡洞口後爲孫可望
困辱賦詩三章冠帶自縊其一云吉子莫堪偃息居慘逾
憂繫又何如微臣血化三年碧濺向君前作佩魚州人涕

泣傳誦之子起龍亦能詩家於州

金堡字道隱浙江人桂王時官給事中剛直敢言以黨事被杖下獄避地寓新寧近粵之茅坪菴時往來武岡後入

廬山爲僧自號澹歸二子亦祝髮武進趙繼鼎

字取新司農恭毅公

申喬之父也

勸以金氏不可無後堡盡然乃聽其長子鎬還俗

堡寄繼鼎詩曰無故老兄添一累有緣稚子足三冬阿誰落得便宜去臥聽雲濤萬壑松

方以知字密之桐城人崇正庚辰進士官翰林丙戌

大清兵下汀州執唐王以知與粵中舊臣瞿式耜等共立

武岡州志

卷二十三

流寓

聖

桂王丁亥王走桂林以以知爲大學士同式耜入閣辦事以知不至遣使慰勞湖南何騰蛟趣其兵入衛以知遂寓居武岡之洞口未幾至洪江赴水死畱詩二章付其僕云且夕刀頭思文章豈再持死生一片血天地百年悲遺稿無多句將書寄二師孤心從此別莫問今何時原矢魂相見而今面亦離縱來仍未話隔去不須悲惡趣憑人積孤懷只了隨黃泉疑忌少容我訴相知以知著有通雅五十

二卷物小識十二卷

武岡州志卷二十三